

真空休歇之餘更無別地獄種作冤業六識熾然如火熱立我
爭人昧休歇甘受碎身並拔舌休與歇真口訣無愚無智無工
拙從上師真只恁修不遇知心誰肯泄休非休歇非歇大用現
前無扭捏主張元化絕形蹤囊括虛空超起滅亦無休亦無歇
歇歇休休皆強說欲知真歇與真休一輪皎潔中秋月

錢塘有作

紅霞映朱欄白雲隱青山塵中人不到雙鶴舞柴關瑤琴一曲
詩數篇山童煮茗爐無烟爲思塵世去遊樂一別洞天今幾年
湘江江上月初白湘浦浦邊風色清斷腸聲咽玉笛碎愁殺霜
堤多少情人 生總浮雲仙家依舊春歸去來兮樂吾真

道藏輯要

虛靖真君語錄

十一

又翼集七

和元規任從他歌

任從他儘教他莫管他他非奈我何盡日閑同方外友高
吟落筆如懸河世上無心結凡累匣中有劍降陰魔長生已悟
玄關旨從教烏兔走如梭塵勞汨沒誠堪惡孰肯飄蕩隨蹉跎
靜處每思喧處事到頭空自競噓呵任從他儘教他莫管他但
從元氣養冲和有時恣把丹書讀無事閑尋玉軫歌我心非石
不可動任從俗論生乖訛松簪布褐且自樂豈戀浮華張綺羅
神爐交媾鍊金液混乎湛湛而日多功行圓成共歸去飄飄飛
蓋拂霄河任從他儘教他莫管他

橐籥歌

休言大道無爲作須向房中明橐籥過時不動片時間紫霧紅
光亂灼灼青龍喜白虎惡赤蛇纏定烏龜殼縱然過得尾闕關
又被曹溪路隔著兩條直上絜丹田決言上有三清閣閣下分
明有玉池內有長生不死藥依時下手採將來服了蓬萊受快
樂

靖通菴歌

吾結草庵山之中旁人笑我名靖通都來方寸間田地大包世
界同虛空我庵非通亦非靖玲瓏八面無形影盈虛消息任天
機庵內主人都不省有時風雪三冬天山前盡日無人煙頑空
墨黑晝如夜庵中光耀長周圍有時風雷平地起山沉江湧流

道藏輯要

虛靖真君語錄

三

又翼集七

雲氣龍吟虎嘯萬形喧庵內情緣無止起環庵松竹連天青冬
不悴兮春不榮人來謾笑庵居苦徹骨貧來徹骨清清貧生理
十分好翻憶朱門多餓殍君能認得自家珠終身豈羨他人寶
庵似身兮主似心欲明庵主須參尋驢胎馬腹河沙夢那知鐵
鑛藏精金高著眼睛速下手只今覓取無中有言窮理絕妄緣
空無毛獅子撩天吼庵前大厦皆蘧廬知音有幾同庵居若非
捩斷懸崖手誰解伊邊認得渠閒中有樂無人識靜處工夫閒
裏得自然妙用自然真向上神仙皆此出浮生短景甚悠悠一
切庵壞便須休溥勸吾門諸學者不昧此庵須早修

野軒歌